


De transitu Tartarorum  
PER PQCVCIAM, ANNO  
M. D. XCIII.

EPISTOLA.

AD ILL<sup>mum</sup> ET R<sup>mum</sup> DIS DOMINVM  
CYNTHIVM, S. R. E. TIT. S. GEORGII  
Cardinalem Aldobrandinum:

AB ILL<sup>mo</sup> D<sup>o</sup> IOAN. DE ZAMOSCIO,  
R. P. SUPREMO CANCELLARIO, ET  
Exercituum Generali

missa.



CRAC. In Officina Lazari. Anno D.  
M. D. XCIII.

ILLVSTRISSIMO ET REVERENDISSIMO  
PRINCIPI ET DOMINO, DOMINO GEORGIO,  
S. R. E. Tit. S. Sixti, Presbytero Cardinali Raduilo, perpetuo Ad-  
ministratori Episcopatus Cracouieñ. &c. Duci Olycæ & Niesviez,  
&c. &c.

Domino ac Patrono meo colendissimo.

Cum hisce diebus ab illu. et Magnifico Domino Palatino Lublinensi, eodemq;  
Generali Cracouiensi Capitaneo, Senatore et dignitate et uirtute praestanti,  
exemplum epistolæ ad Illustriß. S. Gregorij Cardinalem, Illustriß. et Magnifici  
Domini Cancellarij, et generalis regni, de expeditione proxima Tartarica comu-  
nicatum mihi fuisse, digna mihi uisa fuit, quæ publicè edita in omnium manus  
perueniret. non modò quòd quæ publicè geruntur, ab omnibus cognosci pu-  
blicè intersit: uerum etiam ut opinionis cuiusdam errore animi hominum libe-  
rentur. Inueterata enim quorundam animis opinio infudit, Scytharum rabiem  
celeritate sola ferè metuendam: uiribus, roboreq; aut nihil aut parum posse. quæ  
res nobis certè hactenus potissima quasi securitatis: hæc uero non paucorum  
incommodorum causa extitit. Secus autem totum id esse, non modò priscorum,  
eorumdemq; potentissimorum Regum, ut Cyri maioris, Darij, Alexandri magni,  
cæterorumq; quibus aliquid cum Scythis rei fuit, non satis feliccs bellorum exitus  
testantur: sed uel præsens hæc audacia illorum, numero et robore fidens, ostens-  
dere potest. Cui quomodo occurri posset utinā tam serio homines cogitationem  
suscipere uellent: quam cum quid secus, ac uolumus, accidit, aut dolent, aut indi-  
gne ferunt. Tibi quidem Illustrißime Cardinalis, cum ob eas, quas ostendi, cau-  
fas, publici iuris epistolam hanc faciendam iudicasse, priuatim tamen consecran-  
dam quasi putaui, primum ut ad amplissimum Cardinalem scripta sub tanti Car-  
dinalis nomine in publicum prodiret: tum uero maxime, quòd tam illustri loco,  
et quasi in specula quadam regni huius positus, de commnni salute et cogites di-  
ligenter præ ceteris, et tantum studii ac laboris impendas. Vale. Datum  
Cracouie die 10. Sept. Anno 1594.

Illustriß. Celsitudinis Vestræ,

paratiß. et obsequentiSS. Seruitor;

Matthias Clodzinski, S. Sedis Apostolicæ  
Protonotarius, Praepositus Vilnen. Can.  
Crac. S. R. M. Secretarius.

DE TRANSITV TARTA-  
RORVM PER POCVCIAM AN-  
NO M. D. XCIII. EPISTOLA:

*Ad Illustriss. & Reuerendiss. Dominum  
Cynthium, S. R. E. Tit. S. Georgii Cardi-  
nalem Aldobrandinum: ab Illustriss. Dño  
Ioan, de Zamoscio, R.P. supremo Cancel-  
lario, & exercitt. Generali, missa.*

Illustrissime & Reuerendiss. Domine.

**P**RO EO LOCO, QVO  
apud S. D. N. Illustrissima  
D. V. est, proqué eius in  
me benevolentia, nulla res  
maior hic est, quam ad rem  
Christianam pertinere pu-  
tem, de qua, non meis lite-  
ris certiorem Illustriss. D. V. faciendam mihi  
statuam. Atq; optarem sanè letiore aliquo nūtio  
impertiri me Illustriss. D. V. posse; sed cùm om-  
nia, quæ

A ij



nia, quæ ab aliena seu diuina potius voluntate  
pendent, optare quidem, & pro virili, vt quām  
optimè cadant, elaborare possimus; non raro  
autem aliter cadant, quām vel optamus, vel spe-  
ramus: eius nunc rei nuntiū perscribere Illustriſſ.  
D.V. cogor: que, quem alijs dolorem afferat, ne-  
scio, mihi certè vitam acerbam facit. Tartari igit-  
tur, cùm, omnium ferè animis ab expectatione  
eorum auersis, nauigijs, à Turcarum Tyrāno nu-  
merosissimis, eis subministratis, solito traiectu  
relicto, in ipso ostio properè Boryſthenem traie-  
cissent; mox Nestro etiam ad Thehinam supra  
Moncastrū Turcicæ ditionis transmisso, inde su-  
periore via, qua Solymanniano bello viſi fuerant,  
versus Taurinū rectâ ituros, & ipsi pre ſe tuliffent,  
& ex Valachia nunciaretur; subito per Valachiā  
itinere conuerso, primū per oram quandam  
finium regni, deinde Transiluanicæ ditionis in  
Vngariam penetrârunt: ita autem perruperunt,  
vt quamvis paruæ omnino vires paratae eſſent,  
quibus numerosissimus barbarorū exercitus re-  
morari posset; magis tamen ferè fuga, aut ſimilis

fugæ

fugæ profectio eorum , quām paucitas nostra ,  
summo pugnandi ardore incensa , prælium exi-  
meret . Ad quam quidem totam rem , nihil incō-  
modius ferè accidisse mihi videtur , quam quòd  
ante discessum regium , seu ante proxima potius  
Comitia , de periculo , quod à paganis expectan-  
dum esset , nihil cum M. Regia communicatum  
fuerit : atq; ita in tempore & periculo illi obuiā  
iri , & quo illud propulsaretur , iustus exercitus  
comparari non potuerit . Cùm enim de cōmu-  
nicatione belli huius primùm post discessum re-  
gium , rebus Sisekano prælio iam exasperatis , &  
spe pacis præcisā , aliqui ex Senatoribus appellati  
fuissent , accidit ; vt neq; à Regia Maicestate matu-  
rè rebus ijs occurri potuerit , de quibus ante di-  
scessum suum nesciuisset ; & illa absente , ne vel  
omnium ordinum conuentus tutò haberí , vel  
vt maximè habitus fuisset , quicquā de huiusmo-  
di rebus statui posset , vereremur . quod quidem  
vel apud ipsum nuntium Cæsareæ M. iam hye-  
me non dissimulaui , responsumque , quod illi tū  
dederam , cùm ad Sereniss. Regem in Sueciam ,

A iiij

tum

tum ad Sereniss. Reginam viduam Varsouiam ,  
ad Illustriss. etiam Cardinalem Radiuillum, alios  
que nonnullos Senatores, iisdem verbis, quibus  
id dederam, mox perscripsi. Cum enim ut alios  
Senatores, ita me quoque nomine Cæsareæ M.  
appellasset, & difficultatem conuentuum indi-  
cendorum , & ad huiusmodi res sciscendas, ipsa  
Regia Maiestate præsente opus esse, multis ei iam  
tum demonstravi. Ad Tartaros verò, quod perti-  
neret, respondi, posse eos ea via, qua Solymanno  
Sigenum obsidente, usi fuissent, itinere à regni fi-  
nibus diuerso & remoto, in Vngariam perueni-  
re. quam ob causam cum Mosco potius com-  
municandum Cæsareæ Maiestati me putare, ut  
in Tartaros intentus esset, cum præsertim nobis  
etiam, si auxiliij quid Christianis ferre deberemus,  
ita domo proficiscendum esset, ut à Tartaris se-  
curi essemus, si per nostros fines nihilomin9 per-  
rumpere vellent, cum id sine damno & iniuria  
nostra futurum non esset, rem ipsam, prohiben-  
di eos , vt cunque possemus, necessitatem nobis  
imposituram ostendi : militem tamen exiguum  
admo-

admodum iam esse : cùm omnis ratio grauioris  
periculi propulsandi , ad publicam ferè expediti-  
onem in Comitiis relata esset , ( quæ contra tan-  
tam hostis eius celeritatem , non satis certè expe-  
dita est , ) Verisimilius tamen videri mihi dixi , si  
in Vngariam ituri essent , per Turciçam ditionem  
ituros ; quò recentiores ad bellum venirent , cùm  
omnis bellandi eorum ratio , in celeritate ferè  
consistat . In omnem certè euentum , non maior  
ordinario numerus equitum scriptus fuerat , qui  
pro more contra subitas hostium excusione s ,  
excubarent . Hisce partim viæ , quæ diuersæ sunt ,  
obsidenda , partim debellandus hostis fuerat ,  
qui celeritate sine vlla controuersia facile omni-  
bus gentibus præstat , numero autem non mul-  
tis , audacia & robore corporis , nulli impar est .  
Duę omnino rationes excludēdi eius erant : vna ,  
vt vel in patentibus campis illi occurreretur : al-  
tera , vt viæ omnes , quæ per montes ducunt , in-  
siderentur . Prælio nulla parte hosti parem , cum  
tantis hostium copijs , quantæ Tartaricæ sunt , æ-  
quo in loco decernere , cuius rationis sit , quili-  
bet

bet facile iudicare potest. Reliquum erat, ut vel  
vnius viæ, qua iturus putabatur, aut cùm plures  
sint, omnium angustiæ occuparentur, quorum  
illud, si in aliam viam deinde se conuertisset, elu-  
dere in ipsius omnino potestate esset; hoc autem  
non modo sine ullo fructu, verùm præsentissimo  
etiam cum periculo futurum, cùm copiæ per se  
exiguæ in plures minoresq; partes distractæ, ne  
vnum quidem impetum tanti exercitus sustine-  
re potuissent. Non minus ad hæc incommodum  
accedebat, quòd cùm superiorum, tùm proxi-  
morum etiam comitiorum constitutione, cer-  
tus locus versus Borysthenem designatus fuerat,  
in quo copiæ in statuis haberentur: hostis au-  
tem diuersa & breuiore longè vi aper Valachiam  
in fines regni irruperit. Cùm tamen iam sub ini-  
tium ferè quadragesimæ de consilio hostium a-  
liquid inaudiuissem, mox cum ad alias passim,  
tùm maximè ad Senatores literis datis, certiores  
de eo illos feci, cùm sigillatim plerosque, tùm  
coniunctim eos, qui Varssauiae ad audiendum  
Czausium conuenerant: verùm omnibus ferè,

vt non

vt non negligendum periculum videbatur; ita  
omnium ordinum, absente Rege, conuentus ha-  
bendi difficultas obstabat. Interim verò hoste  
morante, vt fieri solet, ab alijs contemni pericu-  
lum cœpit: ab alijs ne credi quidem; quidam e-  
tiam aliter diligentiam meam interpretari: quæ  
securitas non parùm deinde, cùm à Valacho, in  
animis hominum confirmata fuit, tūm ab ipso  
Tyranno Turcarum, quorum ille cùm aduen-  
tū Tartarorum ipse antea denunciasset, postea li-  
teris Turcæ, quibus in Taurinensem viā comme-  
atū pro Tartaro illi imperabat inductus, Came-  
netiā dimissis, alia via, qua superioribus bellis in  
Vngariam iuerant, Tartaros ituros nunciabat:  
& tanquam oīnnia pacata iam essent, ad nundi-  
nas oppidorū suorum ex vicina Podolia & Russia  
homines inuitabat. Ad Turcam verò, cùm sub  
discessum regium, nuncius missus esset, qui, quid  
absente rege expectandum nobis ab illo esset,  
exploraret, simulq; de Tartarorum iniurijs que-  
reretur, ita eum dimiserat; vt nihil omnino vel  
à se, vel à Tartaris hostile nos expectare debere,

B

proli-

prolixè promitteret. Ego tamen, cùm priuatum  
militem, quem meis stipendijs alo, instrumen-  
tumq; bellicum, iam primis quadragesimę tem-  
poribus nihilominus in vicinis locis reliqui; vt,  
quàm primum certi aliquid de aduentu hostium  
cognouiſſem, ipſe ad eos aduolare; tum pu-  
blicum militē, quòd ad potui, ijsdem in locis, mo-  
ratus fui. Sub exitum Iunij, cùm hostis moran-  
tis aduentus iam fruſtrà expectare putaretur, D.  
Castellanus Leopoliensis, campeſtris militię pre-  
fectus, partim conuitijs nobilitatis eorum loco-  
rum, grauem ſibi militem querentis, partim ſci-  
ti comitialis autoritate adactus, verſus Boryſthe-  
nem, quemadmodun in comitijs constitutum  
fuerat, mandatis ea de re à me non expectatis,  
militem promouit. Interim Tartarum Valachi-  
am iam ingressum, ac maximis itineribus ad fi-  
nes regni contendere diuersis nuntijs ad me per-  
fertur. Magnam ſpem habebam, fore, vt partim  
in Valachia moræ aliquid ei obijceretur, partim  
arboribus deiectis, vijsqué per quas iturus eſſet,  
obſtructis, impetus eius non nihil retardaretur.

qua

qua de re iam multò & antè , & postea hoste ad-  
uentante non solum cum nostris , verùm vicinis  
etiam , literis ea de re ad illos datis , partim ipse ,  
partim per alios communicaueram ; atque ita  
non modò adipisci nos hostem posse sperabam ,  
verùm paruis etiam copijs inter montes & via-  
rum angustias rem contra eum gerere . Itaq; li-  
teris ad exercitum & nobilitatem , quibus ad ar-  
ma eam conuocabam , mox dimissis ; ipse priua-  
tis tantùm copiolis meis , quas , quemadmo-  
dum suprà demonstrauí , in vicinioribus Vn-  
gariæ locis , per quæ iturus hostis putabatur ,  
reliqueram , tormentisq; bellicis , campestri usui  
aptis , ibidem hostes arreptis , versus contendi .  
qui interim nullo in Valachia impedimentoo ob-  
iecto , ab ingressu in Valachiam tertio die in fi-  
nes regni percurrit , indeque prioribus uno atq;  
altero diebus , lentioribus aliquanto itineribus  
contendit ; quò , & per incendia terrore circum-  
lato , ancipites animos hominum distraheret , &  
equos recrearet ; vt , postquam ad montes perue-  
nisset , tanto magis celeritatem illorum incitare

B ij

posset ,

posset. Præ cæteris in mēorūm necessariōrum possessiones maximè sœuire instituit. Præter alios in primis Haliciam, D. Palatini Belzensis , affinis mei, præfecturam , oppidum immunitum, non modò exussit; verùm, cùm eodem in loco ipsum Palatinum in arce lignea esse cognouisset , qui eam expugnarent, incenderentq; summisit : quibus strenuè reiectis , nulla vltiore mora interposita, vltierius progressus , simili odio Kalussam D. prefecti campestris, cōsanguinei mei, territoriumque eius ferè omne, ex instituto exussit. Erat in exercitu eius turma equitum Turcicorum, quibus Czausius præerat, quasi custos inspectorque illi additus. Cùm superiore bello Solymaniano in Vngariam Tartarus iret, à Thehina oppido, per oram Moldauię rectâ versus Albam Gręcam, seu Taurinum, quæ Turcici imperij in Vngaria est, contendit. Cùm tamen per regni huius fines eum iturum perlatum ad me esset, propterea hoc itinere illum euocatum suspicari cœperam ; vt cum hyeme iam obfessuri Christiani Hatuanum dicerentur ; qui autem frigus & in-

com-

commoda hyemis ferre possent, præter Tartaros, ex alijs gentibus nulos ferè Turca habeat, illis immissis, Christianorum copias distineret: ean demq; ob causam, postea æstate etiam non sine cura transitus eius esse, desinebam; quòd id consilium Turcæ esse verebar, vt omni parte Vngariæ, quæ intra fines nostros & Danubium est, per Tartarū vastata, cùm hanc incendijs & populationibus deleuisset, eò facilius Transdanubianos etiam in potestatem redigeret. Nunc, cùm hoc solum ferè itinere hoc assequutus esse videatur, vt ad exercitum Turcicum perueniret; quid consilij secutus sit, vt illa relicta per Poloniæ & Transsyluaniæ fines non sine periculo, certo autem cum detimento, & vexatione exercitus ire maluerit, non satis assequor. Illius enim commodum, seu Christianitatis incommodum si speitemus, et si Taurinensis via longior sit, quòd tamen per pacata vbiique iter illi sit, hoc cæteris ei præstat; vt partim sine periculo vlo, partim quod nullo periculo urgente, pro arbitrio suo moderari id possit, integris equis, in quibus om-

ne robur eius est, ad locum perueniat. Nunc  
cum summa celeritate, viaq; impeditiore, per-  
rumpendum illi fuerit, attritis• defatigatisque,  
aut certè non satis integris equis, illum euafisse,  
vel id argumento esse potest, quòd quámprimū  
in plana Vngariæ ex montibus penetrasset, neq;  
agmina vlla ad populationes faciendas, quoquo  
uersum longius more suo dimiserit, & recta ferè  
ad exercitum Turcicum, quāta maxima potuit,  
celeritate vno agmine contendit. Paulò ante ad-  
uētum ipsius, manu aliquā in finibus facta, villas  
aliquot Turcicas Kosaci exusserant. An igitur  
hac re irritatus, ad vindicandas quasi iniurias ha-  
sce illorum iter huc conuerterit, siue etiam à Si-  
nan Bassa in odium æmuli eius Ferat Bassæ, qui  
nuntium Regium cum eo, quod suprà demon-  
stratum est, responso ex porta dimiserat; vel ob  
Hatuani obsidionem soluendam, quæ tamen,  
cùm in Vngariam peruenit, soluta iam fuerat,  
hoc itinere ire iussus fuerit, coniicere non pos-  
sum. Per Poloniæ quidem fines perrupturo, etsi  
plures viæ propositæ sint; propinquiores tamen

tres

tres ferè. Vna latior aliquantò, quàm cæteræ, at-  
que ob id commodior, quòd verò frequentissi-  
mis pagis maximè culta sit, ob prædam etiam  
maximè hosti expetenda, per Samboriam; alte-  
ra iuxta Strium flumen, quæ vtraque Mukaciam  
Cæs: ditionis Vngariæ oppidum rectà ducunt;  
tertia remotior, secundùm Oporum alterum flu-  
men, versus Hustum Transiluanicæ ditionis pre-  
fecturam, intráq; territorium Hustense iam cæ-  
teris ferè angustior. Quòd Samboriensis via, &  
prima mihi versus hostes contendenti occurre-  
ret, & vt omnium commodissima, prædæque,  
quam sequi ille solet, faciendæ maximè oppor-  
tuna, ea etiam Tartarus iturus pro certo nuncia-  
retur, ea occurrere illi institui: à qua nimirum vt  
maximè alia via iret, ipsa tamen itineris ratio, &  
series, vltierius deinde versus eum me duceret.  
Iam in conspectum ignium hostilium peruenie-  
ram, non longoq; interuallo hostem abesse sen-  
tiens, mox leuiores equites aliquot, qui aduen-  
tum hostis explorarent, misi: alios paratos ha-  
bebam, qui velitationibus in locum mihi com-  
modum

modum hostem pertraherent; ita animo paratus, ut dum exercitus reliquus aduentaret, vel honesta morte, si sustinere inopetum eius non possem, saltē morarer. Interim hostis in Hustensem viam se conuertit, quod ex eo, quod nulos ignes iam amplius videbam, mox suspicatus, ne expectato quidem reditu exploratorum, mox moui. In itinere deinde ut progrediebar, voluntarij aliqui se mihi adiunixerunt, tūm D. praefectus campestris, cūm stipendiario milite, qui tanta celeritate aduenerat; ut cum magno interuallo longius iter à statuis, quām Tartari per Valachiam habuisset, fama tamen aduentus eorum excitus, vix non cursum eorum adæquārit. Impedimentis omnibus relictis, campestribusque tormentis solis assumptis, quanta adhiberi à nobis potuit, maxima festinatione, non minore autem spe, secuti hostem sumus; fore, ut si alicubi obstaculi aliquid obiectum ei fuisset intra montes, assequi eum possemus. Interim hostis tanta contentione progredi, ut vnius diei itinere, per plana quatuor, in montibus quinque,  
atque

atque ita coniunctim nouem miliaria nostratia  
peruolaret , vnoque isto itinere, ad radices iugi,  
quod transuersum per montes eos protenditur,  
pertingeret : Beskieth vulgo accolæ vocant , fi-  
nesq; ditionis Polonicæ & Transyluanicæ dister-  
minat. ab eo deinde ad septimum circiter mili-  
are, præfectus Hustensis, qui & à me ea de re ad-  
monitus fuerat , & ab ipso etiam principe Tran-  
siluaniæ ternis literis , de aduentu per fines no-  
stros hostis, sibi nunciatū iam, priusquā in Hustē-  
sem viam hostis se conuertisset, certioreme fef-  
cerat, arboribus deiectis, ipse ei in angustijs , per  
quas ad Hustum itur, se obiecerat. Verūm hostes  
summa audacia & pernicitate , à lateribus per  
cacumina montium se præcipitantes , à tergo  
illum circumuenere ; vt maiore parte cæsa, præ-  
fectus, cum paucis aliquot, ægrè fuga euaderet.  
Pòst nullo obſistente, versus Hustum promouit :  
montibusque superatis in patentes Vngariæ  
campos euasit. Secutus illum sum Kielecza-  
num vsque, Transyluanicæ ditionis pagum : vbi  
consilio de persequendo hoste habito , cum per-

C

mon-

montes in plana eum iam euafisse constaret , vt  
sine vlla ferè spe, hostem pernicissimum, qui pre-  
fertim planiciem iam teneret , & nullo in loco  
moraretur, cum exercitu, & exiguo, & tantis iti-  
neribus non mediocriter defatigato adipiscendi,  
in alienam ditionē non accersiti, in uitatiuē, quod  
verò caput esset , iniussu regis, aut ordinum, ho-  
stem vterius persequeremur , nulli eorum , qui  
in consilio mihi aderant, visum fuit. Itaque, cùm  
in loco à Tartaris iam antè vastato , vel propter  
famem diutius subsistere non possemus , quām-  
ūis dolens & mōrens, quid aliud tamē facerem ,  
quām vt intra fines exercitum reducerem , non  
reperi. Habeo autem nunc eum propinquis in  
locis. Interim, cùm Regiæ Maiestatis , quæ sub  
hoc ipsum tempus , quo hæc scribo, in regnum  
iam regressa nunciatur, tūm ordinum mandatū  
expecto. Apud quos, quantum vel cohortationē,  
vel precibus valuero , omnibus certè rebus in id  
incumbere non intermittam; vt quām fluxa bar-  
barorum fides sit, vel ex actionibus hisce eius,  
qui non modò fœderatam pacem nobiscum ha-  
bet,

19

bet; sed nouissimè etiam per nuncium regium  
omnia pacata publicè nobis renunciârit, æsti-  
ment; præsensq; Christianitatis periculum com-  
mune sibi cum reliqua Christianitate ducant. Ex  
itinere equestris ordinis quēdam à se captum, &  
iuramento de mandatis suis ad me perferendis  
prius adactum, denudatumque, & scuticis, quò  
firmior mandatorum ipsius memoria in illo hæ-  
reret, cæsum dimisit. Summa hæc fuit, vnum  
me potissimum obstat, quo minus donatiuum  
illi solueretur. Itaque nisi superiorum annorum  
donatiua, quām primum soluenda ei curarem,  
breui se apud nos fore, ipsumque me pro dona-  
tiuo ligatum Turcæ ducturum. Deum Opt.  
Max. precari non desino, vt iuuandæ Christiani-  
tatis, hostisque vlciscendi voluntatem quidem  
eandem, quam semper habui, facultatem eius  
testandæ maiorem, posthac mihi tribuat. Quod  
reliquum est, gratiæ Illustriss. D. V. me com-  
mendo, omniaque fausta ac felicia à Deo Opt.  
Max. illi precor. Datum Zamoscij die xij.

Meniis Augusti. Anno Domini,  
M. D. XCIII.